



UPA 2015/124  
15.maj 2015  
Naaja H. Nathanielsen

**Aatsitassarsioqatigiit aatsitassanik misissuiniarneranni aammalu misissuinerit suli ingerlagallarneranni innuttaasunik oqimaaqatigiissumik paasisutissiisoqartarnissaa siunertaralugu, apeqqueteqaat tunngavigalugu Inatsisartut oqallinnissaannik siunnersuut.**

(Inatsisartunut ilaasortaq Kalistat Lund, Inuit Ataqtigiiit)

Siunnersuuteqartoq Kalistat Lund qutsavigaarput oqaluuserisassamik uuminnga saqqummiussineranut.

Nunatsinni aatsitassarsiornikkut ineriartortitsineq ilutigalugu, suliffeqarfiillu nunatsinnut tikittartut amerliartornerini ilisimasatta annertusiartornissaat pisariaarpoq. Suliniutit ataasiakkaat kisiisa pinnagit aammali aatsitassarsiortut akornanni periuuserineqartartut ilisimasariqarpagut, suliniutinut tapersiisinnaassagutta.

Aatsitassarsiornermik aallarnisaaniarneq tapersorsorparâput aamma nuannaarutigaarput aatsitassarsioqatigiit sumiiffimmini aningaasanik atuisarmata. Taamaakkaluartoq aatsitassarsioqatigiiffiit siunertaat pillugit uppertikkuminartutut pissuseqassanngilagut. Innuttaasut suliffeqarfiit siunertaannik periusaannillu ilisimasaqarnerunissaat pingaaruteqarpoq. Suliffeqarfimmik aalajangersimasumik “tapersersuisuuneq” imaluunniit “akerliuneq” matumani pineqanngilaq, kisiannili ilisimassavarput suliffeqarfiit maaniimmata aningaasarsiorusullutik tamannalu siunertaralugu innuttaasunit tapersorneqarnissartik pisariaqartimmassuk. Tamaattumik suliffeqarfiit tamakku suliniutitik pillugit tapersorneqarnissartik anguniarlugu annertuunik iliuseqarsinnaasarput. Tamanna innuttaaqatigiinut pitsaasunik nassataqarsinnaavoq – pingaartumik kikkut tamarmik suut siunertaanersut ilisimappassuk. Kisianni aamma illuatungaani pitsaanngitsunik kinguneqarsinnaavoq, uukapaatitaagaanni.

Sunniiniartarneq pillugu innuttaasugut ilisimasaqarnerusariaqarpugut. Suliffqarfiit qanoq iliorlutik sunalu siunertaralugu sunniiniartarnersut ilisimanerusariaqarparput.

Taamaaliornikkut innuttaasut suliffeqarfiillu akornanni oqimaaqatigiinnerusumik suleqatigiinnissamut tunngaviliisoqarsinnaavoq. Tamanna pillugu paasisitsiniaanermik

aallartitsisoqassasoq siunnersuutigaarput, tamannalu meeqqanut inersimasunullu sammitinneqassasoq. Matumani aatsitassarsiorneq kisimi pineqanngilaq. Sunit tamanit sunnerneqartuarpugut, pisiassat aalajangersimasut pisiareqqullugit imaluunniit siunertaq aalajangersimasoq tapersersoqqullugu – tamatumunngalu illuatungiliussinaneq ilikkartariaqarparput.

Inuit Ataqtigiinni tupaallaatigaarput Naalakkersuisut suliffeqarfiit qanoq isummersorinnaanerannut killiliumangimmata. Soorunami inuiaqtigiinni kikkut tamarmik isummersinnaanerminnut kiffaangissuseqarput – aamma suliffeqarfiit. Kisianni aamma naatsorsuutigisinnaasariaqarparput Naalakkersuisut qulakkiissagaat suliffeqarfiit saqqummiussingaangamik piumasaarsussangitsut imaluunniit suliniutitik pillugit eqqunngitsunik paasissutissiisassanngitsut. Innutaasut paasissutissanik eqqunngitsunik suliffeqarfinniit tuniorarneqartassanngillat, tamanna suliffeqarfiit aqqissugaannik ataatsimiinnerni imaluunniit naqtanik siammarterinikkut pigaluarpulluunniit.

Naatsorsuutigisinnaasariaqarparput innuttaasut eqqunngitsunik paasitinneqartannginnissaat Naalakkersuisut nakkutigeqqissaassagaat. Tamaaliortoqariaraluarpullu ingerlaannartumik suliffeqarfimmut uparuaatigineqassasoq kiisalu innutaasut naqqiissuteqarfigineqartarnissaat Naalakkersuisut isumagissagaat.

Suliffeqarfiit pasinartunik periuseqartartut arlaannit nakkutigeqqissaarneqartarnissaat aamma pisariaqarpoq. Taamaattuminguna Inuit Ataqtigiit siunnersuisooqtigiinnik sumuluunniit pituttorsimannngitsunik pilersitsisoqarnissaanik anguniagaqaraluartut, aatsitassarsiornikkut suliniutit pillugit pisortanik siunnersuisinnaasunik. Innuttaasut aatsitassarsioqtigiiffinnut tatiginnittuarsinnaassappata isumaqarpugut suliffeqarfiit pimoorussinngitsut immikkoortinneqarsinnaasariaqartut. Inuiaqtigiinni mikisunnguusuni pitsaanngitsunik ataasiakkaannguanilluunniit pisoqaraangat innuttaasut suliffeqarfiillu akornanni tatigeqatigiissinnaaneq innarlerneqartarpoq.

Aatsitassarsiorneq pillugu inatsisini allannguinerit kingulliit pitsanngoriaataanerannik Naalakkersuisut oqarnerat isumaqtigaarput. Kisianni aamma suli pitsanngoriaqqittoqarsinnaasoq isumaqarpugut. Inatsisiliornerni tamani taamaappoq aamma tamanna aatsitassarsiorneq pillugu inatsisinut atuuppoq. Taamammat Aatsitassarsiorneq pillugu Ataatsimiititaliap aatsitassarsiorneq pillugu inatsisivut pillugit tusarniaaniarluni pilersaaruteqarmat nuannaarutigaarput, tamatumani pitsaaqutit pitsanngorsarneqarsinnaasullu sammineqassallutik. Inuit Ataqtigiit tusarniaanermi eqqortumik nakerisassarsiuunngitsumillu paasitinneqartarnissap pisariqarluinnarnera sammissamaarpaat. Sunaluunniit ajunngikkaluartoq pitsanngoriartinneqarsinnaajuartarpoq. Qiviimiataannginnarluta suliaq

naammassereersutut oqaatigissanngilarput. Pitsanngoriaateqartitsinissamut  
periarfissaqarluarpoq taamaammallu kikkut pitsanngoriaatissanik isummersortut tamaasa  
tusarusuppavut. Oqallilluarnissaq qilanaaraarput.